

# সাম্যবাদী

## কাজী নজরুল ইসলাম

গাহি সাম্যের গান --

যেখানে আসিয়া এক হয়ে গেছে সব বাধা-ব্যবধান ,  
যেখানে মিশেছে হিন্দু-বৌদ্ধ-মুসলিম-খ্রিষ্টান । ।

গাহি সাম্যের গান !

কে তুমি? - পার্সী ? জৈন ? ইহুদী ? সাঁওতাল , ভীল , গারো ?  
কনফুসিয়াস ? চার্বাক-চেলা ? বলে যাও, বোলো আরো !

বন্ধু, যা খুশি হও,

পেটে পিঠে কাঁধে মগজে যা-খুশি পুঁথি ও কেতাব বও,

কোরান-পূরাণ-বেদ-বেদান্ত-বাইবেল-ত্রিপিটক--

জেন্দাবেস্তা-গ্রন্থসাহেব পড়ে যাও, যত সখ,--

কিন্তু কেন এ পন্ডশ্রম, মগজে হানিছ শূল ?

দোকানে কেন অ দর-কষাকষি ? -- পথে ফোটে তাজা ফুল !

তোমাতে রয়েছে সকল কেতাব সকল কালের জ্ঞান,

সকল শাস্ত্র খুঁজে পাবে সখা খুলে দেখ নিজ প্রাণ !

তোমাতে রয়েছে সকল ধর্ম, সকল যুগাবতার,

তোমার হৃদয় বিশ্ব-দেউল সকলের দেবতার ।

কেন খুঁজে ফের দেবতা ঠাকুর মৃত-পুঁথি-কঙ্কালে ?

হাসিছেন তিনি অমৃত-হিয়ায় নিভৃত অন্তরালে !

বন্ধু, বলিনি ঝুট্,

এইখানে এসে লুটাইয়া পড়ে সকল রাজমুকুট ।

এই হৃদয়ই সে নীলাচল, কাশী, মথুরা, বৃন্দাবন,  
বুদ্ধ-গয়া এ, জেরুজালেম্ অ, মদিনা, কাবা-ভবন,  
মসজিদ এই, মন্দির এই, গির্জা এই হৃদয়,  
এইখানে বসে ঈসা মুসা পেল সত্যের পরিচয় ।

এই রণ-ভূমে বাঁশীর কিশোর গাহিলেন মহা-গীতা,

এই মাঠে হল মেঘের রাখল নবীরা খোদার মিতা ।

এই হৃদয়ের ধ্যান-গুহা-মাঝে বসিয়া শাক্যমুনি

ত্যাগিল রাজ্য মানবের মহা-বেদনার ডাক শুনি ।

এই কন্দরে আরব-দুলাল শুনিতেন আহবান,

এইখানে বসি গাহিলেন তিনি কোরানের সাম-গান !

মিথ্যা শুনিনি ভাই,

এই হৃদয়ের চেয়ে বড় কোনো মন্দির-কাবা নাই ।